



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Unus Pro Omnibus, Hoc est: Christus Jesus Dei Filius**

**Ginther, Anton**

**Augustæ Vindelicorum, 1733**

**VD18 12431648**

Consideratio CLXI. De cultu & veneratione SS. Crucis & imaginum SS.  
Crucifixi.

[urn:nbn:de:hbz:466:1-45934](https://nbn-resolving.org/urn:nbn:de:hbz:466:1-45934)

# CONSIDERATIO CLXI.

## De cultu & veneratione SS. Crucis, aut imaginum SS. Crucifixi.

*Cui honorem, honorem. Rom. 13. 7.*

I.

Exod. 25. 10.

**N**ihil sanctius olim in lege habebant Judæi, quam arcam Domini, quæ ex lignis incorruptilibus adinstar cistæ quadratæ facta. & coronâ aureâ per circuitum ornata fuit: *Arca de lignis Setim compingite &c.* Hæc arca quasi sedes & thronus ipsius Dei, in his terris fuit, per quam exoratus propitium atque placabilem se populo exhibere, & oracula ac responsa, quando in rebus dubiis per Pontificem interrogabatur, dare solebat; supra hanc arcam & Propitiatorium ex auro purissimo à duobus Cherubinis sustentatum, collocatum est, ob quam causam semper dicta arca ab Hebræis profundo & humili obsequio adorabatur, profanisque capitale fuit eam vel manibus tangere, ut Oza expertus est: *Iratusque est indignatione Dominus contra Ozam, & percussit eum super temeritate,* vel curiosius solum oculis intueri, uti Bethsamitibus accidit: *Percussit autem de viris Bethsamitibus, eò quòd vidissent arcam Domini: Et percussit de populo septuaginta viros, & quinquaginta millia plebis.* Tanta nimirum hujus arcae religio, cultus & æstimatio fuit, undè rectè pro lemmate illi inscribes: *Sancta sanctè.*

2. Reg. 6. 7.

Reg. 6. 19.

Per hanc arcam fœderis Crux Dominica præfigurata est, quæ est vera Christianorum arca, vel potius ipse Crucifixus Dominus, ita S. Gregorius: *Arca est Redemptor noster, qui in cruce exaltatus verum & unicum Propitiatorium pro peccatis nostris factus est: Et ipse est propitiatio pro peccatis nostris, non pro nostris autem tantum, sed etiam pro totius mundi:* Quapropter dignissimus est, ut ab omnibus profundissimè animi demissione adoretur. Audi Psaltem regium: *Exaltate Dominum Deum nostrum, & adorare scabellum pedum ejus, quoniam sanctum est,* per quod scabellum ab omnibus colendum & adorandum S. Hieronymus crucem Dominicam intelligit. Ita Quaresmius.

1. Jo. 2. 2.

Psal. 98. 5.

Quaresm. to. 2. c. 12. sect. 1.

2. His

2. His præmissis, inter Catholicos & Sectarios non levis est controversia, quo tandem cultu ac veneratione SS. Crux, aut imago Crucifixi Salvatoris nostri honorari & coli possit, cum DEUS expressè quondam mandaverit: *Non facies tibi sculptile, neque omnem similitudinem*, Exod. 20. 4. *qua est in cælo desuper, & qua in terra deorsum.*

Respondetur cum unanimi Ecclesiæ, Conciliorum & SS. Patrum sensu & consensu, SS. Crucem, aut imaginem Crucifixi JESU cum certo respectu ad ipsum prototypum, seu exemplar quod proponit, esse colendam cultu latriæ, NB. non absoluto, sed respectivo, eò quòd talis cultus & adoratio crucis non in lignum aut materiam, sed in ipsum suum prototypum, videlicet Crucifixum JESUM tendat ac referatur. Ita Concilium Nicænum, quod fuit œcumenicum: *Honor imaginis resultat in prototypum*, ex quo pariter hi duo versiculi in latinum translati sunt:

*Effigiem Christi cum transis, semper honora,  
Non tamen effigiem, sed quem designat, adora.*

3. Ita olim Jacob Patriarcha, è vita mortali nunc brevi discessurus, fastigium virgæ Josephi Ægyptiorum Pro-Regis adoravit: *Fide* Hebr. 11. 21. *Jacob, moriens, singulos filiorum Joseph benedixit: Et adoravit fastigium virgæ ejus;* ubi observandum, quòd non immediatè virgæ attribuerit honorem, sed Josepho præsentì, imò ipsi Christo, olim in virga crucis orbi universo dominaturo, quem tunc Jacob ex virga Jesse nasciturum non obscure prævidit: & ideò, ait Cornelius, *quasi in imagine sua representatum adoravit.*

Ita Regis imago, purpura, sceptrum, corona, thronus demisso osculo, imò & genu flexo ab ipsis Sectariis adorantur, quem honorem non utique lapidi, ligno, picturæ, auro aut vestimento, sed ipsi Regi deferre cupiunt, quem tantoperè in sua imagine honorant; Certè Angli etiam vacuo throno regio regios exhibent honores, quem nunquam prætereunt, quin illum poplite flexo & humili corporis inclinatione venerentur.

Audi S. Ambrosium dilucidè de hac materia scribentem: *Qui, inquit, imaginem coronat Imperatoris, utique illum honorat, cujus imaginem coronavit; & qui statuam contempnit Imperatoris. Imperatori utique videtur fecisse injuriam.* Sic qui veneratur imaginem Christi, Christum utique videtur honorare, qui verò ejusdem imaginem contemnit, Christum spernit & contemnit, quia honor, qui defertur imagini, in eum redundat, cujus imago est, & è contrario contumelia, quæ statuæ infertur, in eum redundat, cujus est statua.

4. Et

4. Et quid dico? An non illud vexillum in pretio habetur, quod hostes patriæ debellati, civesque in libertate à gravissimo iugo fuerunt asserti? Sic videmus ejusmodi victricis signa, ac gloriosa trophæa Romæ in Vaticano ac passim in aliis templis ante ara suspensa, ut civibus & populo Christiano in memoriam hanc vel illam à Barbaris obtentam renovent victoriam. Ita ille gladius, quo David Goliathum superavit, ab Hebræis, tanquam res DEO sacra, in tabernaculo post Ephod, pallio pretioso involutus, pro memoria & signo erga DEum gratitudinis, ob obtentam victoriam & reparatam populo salutem rectè asservatus fuit: *Ecce hic gladius Goliath Philistai, quem percussisti in valle terebinti, est involutus pallio post ephod &c.* Et cur, obsecro, nos Catholici, qui in cruce à Christo redempti, & à servitute diabolica in libertatem filiorum Dei asserti sumus, non pariter hoc salutis signum ac trophæum debitâ veneratione colamus, & publicè devotioni fidelium ad renovandam redemptionis nostræ memoriam in Ecclesia proponamus? Non quòd lignum aliquo religioso sit dignum honore, sed ille, qui pependit in ligno omni dignus est honore.

1. Reg. 21. 9.

5. Accedit, quòd usus SS. Crucis, aut imaginum crucifixi Salvatoris nostri omnibus fidelibus sit valde utilis, quia instruunt simplices & rudiores in fide, quibus Crucifixus pro libro est; admonent insuper scientes ac doctiores, ne Dominicæ obliviscantur passionis, quia obiecta movent sensus. Afficiunt & excitant omnes veros Christianos ad amandum, colendum & imitandum Crucifixum Jesum: *Sapè venit, ait S. Damascenus, ut Domini passionem animo minimè versantes, conspectà Christi crucifixi imagine, in salutiferâ passionis memoriam redeamus &c.*

S. Damasc.  
de fide Orthodoxa.

Neque hîc periculum aliquòd idololatriæ timendum est, cum SS. Crucem, aut imaginem Crucifixi Domini non ut idolum veneremur, sed omnem honorem in ipsum prototypum cultu relativo & religioso referamus; sicut enim imaginem Cælaris propter Cæsarem, ita etiam veneramur imaginem Christi propter Christum. Audi S. Augustinum rem explicantem:

S. Ang. l. 2.  
de visit. infirmor. c. 2.

*Nec Deus est, nec homo, presens, quam cerno, figura,  
Sed Deus est & homo, quem signat sacra figura,  
Hanc & ego veneror; Jesum quoque semper adoro.*

6. Cæterum objiciunt Sectarii & crucis inimici: Crux Christi & effigies Crucifixi cum cæteris passionis instrumentis potius sunt execranda, quàm honoranda; rationem addunt, quia pientissimo orbis Redemptori attulerunt dolorem & ignominiam; & quis filius illud honoraret patibulum, in quo dilectus ejus pater fuit suspensus? Sed responderetur

Cruce & cætera passionis Dominicæ instrumenta esse, & fuisse signa Christi in nos amoris vehementissimi, quia se illis ob salutem nostram voluntariè subiecit, insuper sunt pignora tam nobilis triumphus de peccato, morte & diabolo, & idèd talia à nobis cultu respectivo adorari. Ad confirmationem dicendum: Si pater voluntario rempublicam, imò & orbem liberasset supplicio ab interitu, & hac ratione suam nobilitasset familiam, posset sine dubio illius filius instrumenta mortis ejus honorare, quemadmodum nos honoramus crucem, & Crucifixi imaginem.

7. Sed pergunt Sectarii urgendo, prout opinantur, prædictum argumentum: Quare, inquit, nos Catholici non quoque asinum veneremur, supra quem Christus Dominus in Jerusalem quondam vedus est? Cùm sit eadem ratio crucis & asini? Respondeo ad hanc impiam & stolidam objectionem, quòd nos Catholici, quorum fides in toto terrarum orbe rutilat, libenter ejusmodi asinum, utpote omnis religiosi honoris incapacem istis Sectariis relinquamus, tanquam proprium illorum reliquiarium, hunc ipsi venerentur, colant & exosculentur, per nos licet. Nos verò Orthodoxi cum Apostolo non in alio signo gloriamur, quàm in cruce Domini nostri JESU Christi, in qua mundum ab interitu vindicavit, in qua Christus triumphavit, & morte suà mortem superavit in æternum. Gal. 6. 14.

8. Finio: Hanc igitur SS. Crucem divino cruore purpuratam & sanctificatam non propter se, sed propter illum, qui in ea pependit, humiliter veneremur, non obstante, quidquid in contrarium blaterent & obganniant impuri Sectarii. O bone DEUS! colunt hi miseri & obcecati, planèque adorant suarum venerum effigies ac reliquias, quas in brachio, vel in collo ad pectus suspensas, aut in hypocaufto (loco Crucifixi) expositas tenent, ex quarum aspectu lætantur, & in effrenes, velut equus & mulus, dissolvuntur cupiditates; Et Christus JESUS & hic Crucifixus ante illorum oculos sit proscriptus & eliminatus? O insensati Galata, quis vos fascinavit non obedire veritati, ante quorum oculos JESUS CHRISTUS proscriptus est in vobis crucifixus? Gal. 3. 1.

Audiant pro coronide hujus Considerationis omnes hæretici & crucis inimici, quorum Deus venter est, & finis interitus, quam tremendam sententiam S. Paulus in ejusmodi crucis Christi osiores pronuntiaverit: *Verbum crucis, ait, pereuntibus quidem stultitia est, his autem, qui salvi fiunt, id est nobis, Dei virtus est.* 1. Cor. 1. 8.

Ginther Unus pro omnibus

Hhhh

CON-